

Ndaej Son Lai Rox Bien Sawson

领教受益编“壮材”

——Lieb ingj aen ban son'gyauq baenzlawz bien sawson Cuengh Gun

□ bonjbauq gicej Dwgz Luogz sij/ingj



▲ Beizyinbanh hwnjdangz yienhciegz.

“30 lai bi daeuj, baez daih' it banh cungj beizyinbanh neix, neix couhwdg hongsaeh Cuengh Gun song saw vah sonhag youh fazcanj baenaj haemq lai.” 7 nyied 28 hauh banhaet, dingq liux Gvangjsih Minzczuz Gyaunuz Fazcanj Cungsims cujyin Couh Gwzyih, doiq bang yozyenz ndaw ban son'gyauq baenzlawz bien sawson Cuengh Gun de naeuz, “Banh baez beizyinbanh neix, vihliux engq ndei hawj hongsaeh ok sawson Cuengh Gun gya ndei fazcanj baenaj, hawj doenghboux biensij sawson Cuengh Gun ndaej daezsang suijbingz, gya vunz guh hong biensij sawson Cuengh Gun.” Ngoenzde, aen ban beizyinbanh neix cingq guh daengz ngoenz daihsam, Couh Gwzyih geij coenz vahsoh neix, gangj cingcuj le vihmaz banh aen ban neix.

Ndaej son lai rox aeu lai ak

Baenzlawz hawj doenghboux biensij sawson Cuengh Gun ndaej daezsang suijbingz? “Vihneix, dou cingj le lai boux lauxhangz daeuj hwnjdangz son'gyauq, gyoengqde lai bi daeuj cienmonz guh hong nem yenzgiu Cuengh Gun fanhoiz, Vahcuengh Sawcuengh, vwnzva Bouxcuengh, vwnzyoz Bouxcuengh, biensij nem fanhoiz sawson Cuengh Gun, gocwngz haifat, biensij sawson deihfueng daengj. Raeuz aeu laemxsim dingq lauxhangz gangj, hag aeu cihsiz, bouj gij cihsiz raeuz mbouj rox de.” Couh Gwzyih daengq naeuz, “Baez neix gihvei nanz miz, muengh gak boux yozyenz gaemdawz baez gihvei neix, itsim dingq lauxhangz son'gyauq, aeu lai rox cihsiz, daezsang suijbingz biensij, comz rengz ce daengzlaeng engq ndei guh hong biensij.”

Lauxhangz damz fwen daeuj soengq“bauj”

“Sanglinz raen lauxyoux, ndawsim gou vuenheij. Hag hwnjdangz ngoenzneix, Sien gangj geij coenz gonq. Gou dungxcaiz mbouj lai, Fanhoiz caiq mbouj ak. Gangjavah miz

loekcak, Cingj bouxak lai son.” 7 nyied 26 hauh banhaet, dwg dangz daih' it, Cinghgoz Minzczuz Yijvwnz Fanhyizgiz yizsinj(gaugaep cizcwng) Gvanh Swgingh, gag bien cit fwen neix, aeu Vahcuengh byauhcuinj daeuj damz. Gyoengq yozyenz dingq liux, bekwngz bobbob. Haet de, Gvanh Swgingh gangj le “sawson cungh siuj yozau baenzlawz youz Cuengh hoiz Gun”. Dangz neix diepgyawj hong bingzciegz, vih yozyenz gejdap vwndiz, hawj gyoengqde ndaej son lai rox.

Ciuq cam rox, baez beizyinbanh neix gungh cingj le 10 boux lauxhangz

daeuj hwnjdangz, gyoengqde dwg lauxhangz fanhoiz, vahgangj, minzczuz, vwnzva, gyaunuz daengj.

Yozyenz eu fwen gyo' mbaiq lauxhangz

“Ndaej raen lauxhangz daeuz, Ciuq neix raeuz vuenheij. Dingq liux dangz goq neix, Lai ndei doeg cib bi.” 7 nyied 28 hauh banhaet, dingq liux Gvangjsih Minzczuz Vwndiz Yenzgiu Cungsims yenzgiuyenz Cinz Caijlonz gangj dangz goq “vwnzva Bouxcuengh”, Gvangjsih Sam Nyied Sam Cazcise cungjbenheiz Cinz Siengzcouh gag bien ok cit fwen neix, yinxlingx gyoengq yozyenz doengzcaez ciengq. Gyoengqde itmienh ciengq itmienh bekwngz, sing eu fwen, singriu, sing bekwngz caemh yiengj, yienhciegz vunz lai angqyangz dangqmaz. Dingq yozyenz caez eu fwen caemh angq, Cinz Caijlonz hix naj riu sim hai. Yozyenz eu fwen gyo' mbaiq lauxhangz son'gyauq, aeu fwen cien cingz, gig miz daegsaek Bouxcuengh.

Ciuq cam rox, Gveigangj Si Cinzdangz Gih Mungzgungx Yangh Gujsanh Siujyoz, Dwzbauj Yen Sawcuengh Yozyau, Majsanh Yen Bwzsanh Cin Hozlungz Siujyoz, Vujsenh Yen Sawcuengh Yozyau daengj 21 aen danhvei gyawj 40 boux yozyenz camgya baez beizyin neix. Gyoengq yozyenz neix dwg boux

biensij sawson Cuengh Gun, daeuj hwnjdang liux, gya ndaej lai rox, caen dwg lumjbaenz “ndei gvaq doeg cib bi saw”.

Baez beizyin neix daj 7 nyied 26 hauh daengz 30 hauh youq Sanglinz gawjhengz. Youq haj ngoenz de, cawzliux dangz Gvanh Swgingh nem Cinz Caijlonz, gyoengq yozyenz lij dingq Gvangjsih Minzczuz Dayoz yenzgiuyenz Mungz Yenzyau gangj vwnzyoz Bouxcuengh, Gvangjsih Minzczuz Dayoz gyaousou Veiz Su' gvanh gangj daegdiemj Vahcuengh, Gvangjsih Sam Nyied Sam Cazcise yizsinj Cinz Siengzcouh gangj fwen Bouxcuengh, Swcigih Minzyijveij Fanhyizcu yizsinj Luz Yaujli gangj fanhoiz baiz danhvei, Gvangjsih Gauhcungh Gogaij Cungsims yenzgiuyenz Bungz Yinfungh gangj gij iugouz nem gveihfan biensij sawson, Gvangjsih Minzczuz Dayoz fu'gyausou Luz Yungjinh gangj 《Fangh'an Sawcuengh》, Gvangjsih Minzczuz Cuzbanjse fuyizsinj Veiz Caijgenh gangj biensij nem doiqyawj sawson Sawcuengh, Gvangjsih Swhfah Yozyen fu'gyausou Huj Ginwngz gangj sawson deihfueng nem banhfap biensij daengj goq dem.

Baez beizyin neix youz Gvangjsih Minzczuz Gyaunuz Fazcanj Cungsims cawjbanh.



▲ Couh Gwzyih cujyin yougwnz ban daengq yozyenz aeu haeujsim dingq goq aeu bouj cihsiz.



▲ Cinz Caijlonz yenzgiuyenz gangj haujlai cungj vwnzva Bouxcuengh.



▲ Gvanh Swgingh yizsinj gangj baenzlawz hoiz ndei sawson cungh siuj yozau.



▲ Mungz Yenzyau yenzgiuyenz giethab vahgangj Bouxcuengh gangj vwnzyoz Bouxcuengh.



▲ Veiz Su' gvanh gyaousou youz feuh daengz laeg dwk gangj daegdiemj Vahcuengh.



▲ Yozyenz nyinhcaen geiq bitgeiq.